

**Uunga siunnersuut: Nalunaarasuartaatitigut atassuteqarneq nalunaarasuartaatitigullu
kiffartuussinerit pillugit Inatsisartut inatsisaat nr. xx, xx. xxx 2017-imeersoq**
*(Saqq.: Kommunit, Nunaqarfinnut, Isorliunerusunut, Attaveqaqatigiinnermut
Ineqarnermullu Naalakkersuisoq)*

pillugu

Sanaartornermut ataatsimiititaliap

ISUMALIUTISSIISSUTAA

Siunnersuutip pingajussaaneerpeqarneranut tunniunneqartoq

Suliarineqarnerani ataatsimiititaliaq ukuninnga inuttaqarpoq:
Inatsisartunut ilaasortaq Bendt B. Kristiansen, Inuit Ataqtigii, siulittaasoq
Inatsisartunut ilaasortaq Jens-Erik Kirkegaard, Siumut, siulittaasup tullia
Inatsisartunut ilaasortaq Pitsi Høegh, Siumut
Inatsisartunut ilaasortaq Jess Svane, Siumut
Inatsisartunut ilaasortaq Villy Olsvig, Inuit Ataqtigii

UKA 2017-ip nalaani ull. 8. oktober aappassaaneerereermermi siunnersuut ataatsimiititaliamit misissorneqaqqippoq.

1. Siunnersuutip imaa siunertaalu

§ 2-mut siunnersuut saqqummiunneqartoq siunnersuutikkut taarserneqassaaq.

2. Siunnersuutip Inatsisartuni aappassaaneerpeqarnera

Inatsisissatut siunnersuut ataatsimut isigalugu tigulluarneqarpoq, taamatuttaarlu § 36-imut allannguutissatut siunnersuut saqqummiunneqartoq naammagisimaarneqarluni.

Sanaartornermut ataatsimiititaliap isumaliutissiisummut tunniussaminut atatillugu innersusseqqinnissaq qinnutiginikuuaa.

3. Tusarniaanermit akissutit

Inatsimmi § 2-mut allannguinnissaq annikitsuinnaammat tamakkiisumik tusarniaanissaq ataatsimiititaliap pisariaqartissimangilaa. Tassani aamma isiginiarneqassaaq inatsisissatut siunnersuummi immikkoortumi tassani taamaallaat periaaserisakkat atuutereersut pillugit inatsisitigut tunngaviliisoqarniarmat.

Taamaattorli ataatsimiititaliap allannguutissatut siunnersuut Atuisartoqarnermut Unammilleqatigiinnermullu Aqutsisoqarfimmut pilertorluinnartumik tusarniaassutiginiuuuaa, taamali sivikitsigisumik piffissaliineq pissutigalugu itisiliinissamut taanna periarfissaqarsimangilaq, tuaviortumilli iliuuseqarnikkut Aqutsisoqarfik siunnersuummut oqaaseqaatissaqarsimangilaq.

4. Siunnersuutip ataatsimiititaliamit suliarineqarnera

Ataatsimiititaliap siunnersuut misissorpaa, misissuinnerminilu malugalugu inatsisissatut siunnersuummi § 2-mi allannguisoqarsimasoq, tamannalu nassuiaatitaqanngitsoq arlaatigulluunniit tamanna oqaatigineqarsimangitsoq, inatsisillu Naalakkersuisumit nassuiaatigineqarnerani aamma ilanngunneqarsimanani.

Taamaattorli ataatsimiititaliap isumaqarpoq, ataatsimiititaliamut paasissutissanik tunuarsimaartitsiniartoqarsimangitsoq imaluunniit ataatsimiititaliamut ussiataariniartoqarsimangitsoq. Ataatsimiititaliap isumaa malillugu suliaqarnermi annikitsumik kukkussuteqartoqarsimavoq, tamatumalu aaqqiiviginissaanut ataatsimiititaliap maanna periarfissaqarpoq.

Ataatsimiititaliap maluginiarpaa naalakkersuinikkut siunnerfik pillugu isumaqatigiittoqartoq, pissutsillu ingerlalluareersut assortussutaanngitsullu nangeqqittariaqartut tamanit isumaqatiginartinneqarpoq.

Radiukkut TV-kullu siaruarterisarnerup atuuttup aalajangersimasumik inatsisitigullu tunngaveqartumik sinaakkusernissaanut immikkut ittumik akuersissuteqarsinnaanermut Naalakkersuisut pilersaaruteqarnerat Sanaartornermut ataatsimiititaliamittaaq tapersersornartinneqarpoq. Sanaartornermut ataatsimiititaliaattaaq maluginiarpaa, allannguutissatut siunnersuut radiukkut TV-kullu siaruarterisarnermut maanna atuuttumut ersarissumik attuumassutilik Naalakkersuisut taamaalillutik tapersersoraat.

Taamaattorli nunarsuarmi pisunut piviusunut ingerlareersunut § 2, imm. 4 nutaaq tamakkiisumik naapertuutinngitsuusoq Sanaartornermut ataatsimiititaliap naliliivoq, tamannalu pissutigalugu tamatuma attatiinnarnissaa isumaqatiginartinneqarpoq.

Aalajangersakkami oqaasertaliunneqartoq ”Radiukkut tv-kkullu aallakaatitanik siaruarterisarneq ammanerulersinneqarsimavoq. Naalakkersuisut tamatumunnga maleruagassiorsinnaapput” ataatsimiititaliap ima paasivaa, nalunaarasuartaateqarnermi kiffartuussineq ”radiukkut TV-kullu aallakaatitanik siaruarterineq” taamaallaat ammanerulersinneqartoq. Ima paasillugu; aallakaatitat illoqarfimmi imaluunniit nunaqarfimmi ataatsimi siaruarterneqarsinnaapput. Assersuutigalugu kiffartuussivik DVB-T.

Taamaattorli nalunaarasuartaateqarnermi attaveqaqatigiinnermut atortuutini ammanerulersinneqanngitsoq tassaavoq nalunaarasuartaateqarnikkut kiffartuussivik ”radiukkut TV-kullu siaruarterisarneq” pillugu atorveqartartoq. Assersuutigalugu napparutit nassitsisutit, nassitsinermi atortut il.il. Nalunaarasuartaateqarnermik kiffartuussiviup ammanerulersinneqarnerani nioqquteqartup taakku TELE-POST-imit peqatigiilluni ataatsimut atuisussatut sulii pisiarisariaqassavai. (Tamanna pisinnaasimassanngippat atortuutit TELE-POST-imit tunineqarsimanerannik pissuteqarpoq).

Tamatuma saniatigut radiukkut TV-kullu aallakaatitassanik satellitikoortitsisinnaaneq aalajangersakkami tikinneqanngilaq. Nalunaarasuartaateqarnermi attaveqaqatigiinnermut Kalaallit Nunaanni inatsiseqarnermi tamanna pisariaqarpoq, assersuutigalugu paraboli nunamiluunniit sakkortusaavik atorlugu. Taamatut attaveqaqatigiinnermut atortuutit Namminersorlutik Oqartussat sulii kisermaassisussaaffigaat, TELE-POST-ilu tamatumani akuersissutaateqartuuvoq. Ima paasillugu; ”radiukkut TV-kullu siaruarterisarneq” pillugu nalunaarasuartaatikkut kiffartuussivimmi nioqquteqartartoq aallakaatitsinissamullu TELE-POST-imit atortunik attartortuusoq taamaallaat najukkami aallakaatitassianik suliarineqarsimasunik nassitsisinnaassaaq.

Ataatsimiititaliallu isumaa malillugu nalunaarasuartaateqarnermi attaveqaqatigiinnermut atortut TELE-POST-imit pisiarineqarsimasut atorlugit Arctic TV-p radiukkut TV-kullu aallakaatitani illoqarfimmut nunaqarfimnullu siaruaattarpai. Ima paasillugu; illoqarfiit akornanni radiukkut sakkortusaaviit Arctic TV-mit pigineqarlutillu ingerlanneqarput. Tamanna aalajangersakkap aallaqqaammut aalajangersagartaani oqaasertaliussani aamma tikinneqarsimanngilaq.

Tamatuma saniatigut Sanaartornermut ataatsimiititaliaq isumaqarpoq, tamatuma pineqannginnera kisermaassinermut aalajangersakkami ilaatinneqassasoq, ilanngunneqartariaqartullu nalunaarasuartaateqarnermik kiffartuussinermi ammanerulersinneqareersut pillugu aalajangersagaq, ukununnga tunngasoq: paasissutissanik ingerlaartitsinermut kiffartuussiviit, internet atorlugu kiffartuussiviit, kiisalu illoqarfiit nunaqarfiilluunniit ataasiakkaat iluanni nalunaarasuartaateqarnermi atortuutit silaannakkut aallakaatitsissutit.

Tamatuma saniatigut imm. 5 innersuussutigalugu aalajangersakkami oqaaseqatigiit aappaat pisariaqanngitsuusut Sanaartornermut ataatsimiititaliap nalilerpaa.

§ 36-imi aalajangersakkamut aappaassaaneerpeqarnerani allannguutissatut siunnersuutitut saqqummiunneqartumut atatillugu aaqqiissutissatut nassaarineqarsimasoq nassuiaatigineqartorlu Sanaartornermut ataatsimiititaliap naggataatungaatigut iluarisimaarlugu oqaatigerusuppaa.

Suliaqarnerup nalaani ataatsimiititaliap aamma maluginiarsimavaa, peqatigiilluni ataatsimut atuisinnaatitaanermik piunnaasaqaatinut tunngasoq UKA 2017/29-imi unammilleqatigiinnermut inatsiseqarnermut nuunneqarsimagaluartoq nassuiaatini ilanngunneqarsimasoq. Tamanna taamaalilluni nassuiaatinit peerneqarsimavoq.

5. Ataatsimiititaliap inassutaa

Ataatsimiititaliap isumaqatigiittup allannguutissatut siunnersuut akuerineqassasoq inassutigaa.

Taamatut oqaaseqarluni isumaliutissiisummilu allassimasutut paasinnilluni ataatsimiititaliap siunnersuut pingajussaaniigassanngortippaa.



Bendt B. Kristiansen,
Siulittaasoq



Jens-Erik Kirkegaard,
Siulittaasup tullia



Jess Svane



Pitsi Høegh



Villy Olsvig